

NO. SOALAN: 23

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : DATUK NOOR EHSANUDDIN BIN
MOHD HARUN NARRASHID [KOTA TINGGI]**

TARIKH : 20 NOVEMBER 2017

RUJUKAN : 10345

SOALAN:

Datuk Noor Ehsanuddin Bin Mohd Harun Narrashid [Kota Tinggi] minta **MENTERI DALAM NEGERI** menyatakan apakah pelan strategik lautan biru Kementerian dalam usaha memerangi penyalahgunaan dadah di kalangan pelajar sekolah dan pelajar universiti.

JAWAPAN

Tuan Yang Dipertua,

Kerajaan melalui Agensi Antidadah Kebangsaan (AADK) telah melaksanakan pelbagai usaha dalam menangani masalah dadah di kalangan pelajar sekolah dan universiti dengan mengambil langkah-langkah strategik dengan memberi fokus kepada pencegahan bersepadu berasaskan Teori Perkembangan.

Program *National Blue Ocean Strategy* (NBOS) di antara AADK dengan Kementerian Pelajaran, Kementerian Pengajian Tinggi serta institusi pendidikan telah diperkenalkan dengan mengguna pakai modul integrasi dalam pencegahan. Sehingga September 2017, sebanyak 100 buah Program Intelek Asuhan Rohani (PINTAR), 165 buah program Sayangi Hidup Elak Derita Selamanya (SHIELDS) dan 88 buah program Sukses, Matang, Aktif, Rasional, Tanggungjawab (SMART) telah dilaksanakan dengan kerjasama Kementerian Pelajaran. Selain itu, sebanyak 194 buah program *Tomorrow's Leaders* di Institusi Pengajian Tinggi turut dilaksanakan dengan kerjasama Kementerian Pengajian Tinggi.

Bagi melaksanakan Program Pendidikan Pencegahan Dadah (PPDa) di institusi pendidikan secara berkesan, pembangunan sumber manusia secara bersama dalam kalangan guru, Kaunselor Sekolah, Pegawai Pembangunan Masyarakat, pihak Lembaga Pembangunan Penduduk dan Keluarga Negara (LPPKN) dan Badan Bukan Kerajaan (NGO) yang berkaitan dijalankan secara berterusan.

Sebuah Kolokium Pendidikan Pencegahan Kebangsaan telah dirancang bagi membolehkan perkongsian hala tuju pencegahan dilaksanakan. Kolokium ini disusuli dengan Bengkel Kemahiran Pendidikan Pencegahan Bersepadu (*Integrated Prevention Education*) di kalangan personalia (*focal point*) yang terlibat dengan kumpulan sasar. Selaras dengan tema Hari Antidadah Peringkat Kebangsaan (HADK) 2017 iaitu "Pencegahan Dadah Bermula Dari Rumah", pendekatan melalui penglibatan ibu bapa diperluaskan kepada 2 kumpulan utama iaitu:

- (i) *silent sufferer* (keluarga yang menderita secara sendirian iaitu pemendaman emosi akibat ahli keluarga terlibat dengan dadah dan masalah sosial lain); dan
- (ii) *parents with vulnerable child* (ibu bapa yang tergolong dalam kategori rapuh yang mana anak mereka berhadapan dengan pelbagai risiko perkembangan diri).

Antara kempen-kempen yang dijalankan selaras dengan pernyataan Dasar Dadah Negara adalah:

- (i) pendidikan pencegahan dalam institusi pendidikan;
- (ii) pendidikan pencegahan dalam keluarga;
- (iii) pendidikan pencegahan di tempat kerja; dan
- (iv) pendidikan pencegahan dalam komuniti.